



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

29 հուլիսի 2022 թվականի թիվ 280-Ա

«ՕՆԷՔՍ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ԿՈՂՄԻՑ ՏՆՏԵՍԱԿԱՆ ՄՐՑԱԿՑՈՒԹՅԱՆ ԲՆԱԳԱՎԱՌՈՒՄ ԻՐԱՎԱԽԱԽՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2022 թվականի հուլիսի 29-ի նիստում, քննարկելով «Օնէքս» սահմանափակ պատասխանատվությամբ ընկերության (այսուհետ՝ **Ընկերություն**) կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին հարցը,

Պ Ա Ր Զ Ե Ց

Հանձնաժողովի նախագահի 2022 թվականի հունիսի 6-ի «Արտաքին դիտում իրականացնելու մասին» թիվ 111-Ա հրամանի հիման վրա «www.onex.am» կայքէջում իրականացվել է արտաքին դիտում, որի արդյունքում կազմվել է «Արտաքին դիտման արդյունքների վերաբերյալ» թիվ 111 արձանագրությունը:

Արտաքին դիտման արդյունքում պարզվել է, որ 2022 թվականի հունիսի 8-ի դրությամբ Ընկերության «www.onex.am» կայքէջի «Դեպի ՀՀ առաքման եղանակներ և սակագներ» բաժնում առկա է եղել հետևյալ հրապարակումը. «ԱՄՆ (օդային) 5-9 աշխ. օր, սակագին՝ 1կգ 6000 դրամ, ԱՄՆ (ծովային) 2-3 ամիս, սակագին՝ 1կգ 1500 դրամ»:

«Մեր պատմությունը» բաժնում առկա է եղել հետևյալ հրապարակումը. «Ծովային առաքում ԱՄՆ-ից՝ 1200 դր/կգ 2-3 ամիս», «Ծանրոցներ Նյու Յորքից դեպի ՀՀ, Անձնական ծանրոցների արագ առաքում Նյու Յորքից դեպի Հայաստան՝ 5-9 աշխ. օր 4000 դր/կգ (\approx \$8)»:

Հանձնաժողովի նախագահի 2022 թվականի հունիսի 22-ի թիվ 002840 գրությամբ (այսուհետ նաև՝ **Գրություն**) Ընկերությունից պահանջվել է ներկայացնել հետևյալ տեղեկատվությունը.

1. Ընկերության կողմից 2022 թվականի հունվարի 1-ից մինչև մայիսի 31-ն ընկած ժամանակահատվածում ԱՄՆ-ից դեպի Հայաստան իրականացված օդային առաքումով պատվերների և դրանցից յուրաքանչյուրի փաստացի տևողության վերաբերյալ՝ առկայության դեպքում կցելով համապատասխան ապացույցներ,

2. Ընկերության կողմից 2022 թվականի հունվարի 1-ից մինչև մայիսի 31-ն ընկած ժամանակահատվածում ԱՄՆ-ից դեպի Հայաստան իրականացված ծովային առաքումով պատվերների և դրանցից յուրաքանչյուրի փաստացի տևողության վերաբերյալ՝ առկայության դեպքում կցելով համապատասխան ապացույցներ:

Ընկերությունը 2022 թվականի հուլիսի 1-ին ներկայացրել է պահանջված տեղեկատվությունը, որի վերլուծությունից պարզ է դարձել, որ 2022 թվականի հունվարի 1-ից մինչև մայիսի 31-ն ընկած ժամանակահատվածում ԱՄՆ-ից դեպի Հայաստան իրականացված օդային առաքումով պատվերների ընդհանուր քանակը կազմել է , որից պատվեր (տոկոսային արտահայտությամբ՝ 13.95%) առաքվել է Ընկերության կողմից հրապարակված իննօրյա առավելագույն ժամկետի խախտմամբ: Նույն տեղեկատվության վերլուծության համաձայն՝ 2022 թվականի հունվարի 1-ից մինչև մայիսի 31-ն ընկած ժամանակահատվածում ԱՄՆ-ից դեպի Հայաստան իրականացված ծովային առաքումով պատվերների ընդհանուր քանակը կազմել է , որոնք առաքվել են Ընկերության կողմից հրապարակված առավելագույն եռամսյա ժամկետի խախտմամբ:

Հանձնաժողովի անբարեխիղճ մրցակցության վերահսկողության վարչության 2022 թվականի հուլիսի 28-ի թիվ 4008 զեկուցագրով առաջարկվել է Ընկերության կողմից տնտեսական մրցակցության բնագավառում հնարավոր իրավախախտման հատկանիշների առկայությունը պարզելու նպատակով հարուցել վարույթ:

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 16-րդ հոդվածի 1-ին մասի համաձայն՝ անբարեխիղճ մրցակցություն է համարվում տնտեսավարող սուբյեկտի ցանկացած գործողություն կամ վարքագիծ, որը հակասում է սույն օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին, խախտում է տնտեսավարող սուբյեկտների միջև կամ վերջիններիս ու սպառողների կամ ձեռք բերողների միջև բարեխղճության՝ ազնվության, արդարության, ճշմարտության և (կամ) անաչառության սկզբունքները:

Օրենքի 16-րդ հոդվածի 2-րդ մասի համաձայն՝ անբարեխիղճ մրցակցությունն արգելվում է:

Օրենքի 16-րդ հոդվածի 3-րդ մասի համաձայն՝ անբարեխիղճ մրցակցություն են սույն օրենքի 17-24-րդ հոդվածներում նախատեսված դեպքերը, ինչպես նաև սույն հոդվածի 1-ին մասի հատկանիշներին համապատասխանող այլ գործողությունները:

Օրենքի 21-րդ հոդվածի 1-ին մասի համաձայն՝ անբարեխիղճ մրցակցություն է համարվում հասարակության մոլորեցումը, այդ թվում՝

1) ցանկացած գործողություն կամ վարքագիծ, որը մոլորեցնում է կամ կարող է մոլորեցնել հասարակությանը տնտեսավարող սուբյեկտի, նրա գործունեության կամ

առաջարկած ապրանքների, դրանց գովազդմանը, տարածմանը կամ իրացմանը նպաստող միջոցառումների, ապրանքի աշխարհագրական ծագման կամ սույն օրենքի 20-րդ հոդվածում թվարկված բնութագրերի կամ պայմանների վերաբերյալ.

2) ապրանքների որակն անհիմն չափազանցելը կամ որակի, քանակի կամ այլ բնութագրերի կամ ապրանքների ձեռքբերման կամ իրացման վերաբերյալ համապատասխան տեղեկատվություն չհիշատակելը կամ տեղեկատվությունն այն ձևով ներկայացնելը, որը կարող է հանգեցնել թյուր տպավորության ստեղծման (ապակողմնորոշման).

3) գովազդի մեջ (գովազդելու ընթացքում) կամ իրացման ընթացքում թերի կամ կեղծ կամ ոչ լիարժեք տվյալների (տեղեկությունների) նշումը կամ այնպիսի տվյալների (տեղեկությունների) բացակայությունը կամ տվյալների (տեղեկությունների) այն ձևով նշումը, որն սպառողին հնարավորություն չի տալիս ամբողջական պատկերացում կազմելու իրացվող կամ գովազդվող ապրանքի կամ տնտեսավարող սուբյեկտի վերաբերյալ.

4) օրենքին հակասող, այդ թվում՝ անբարեխիղճ կամ հակաօրինական կամ հավաստիության կամ պատշաճության խախտմամբ իրականացվող գովազդները, որոնք կարող են կանխել, սահմանափակել կամ արգելել տնտեսական մրցակցությունը կամ վնասել սպառողների շահերը:

Տվյալ դեպքում Ընկերության կողմից «www.onex.am» կայքէջում ԱՄՆ–ից դեպի Հայաստան օդային առաքումների ժամկետը 5-9 օր և ԱՄՆ–ից դեպի Հայաստան ծովային առաքումների ժամկետը 2-3 ամիս հայտարարելն այն դեպքում, երբ այդ ծառայությունների ժամկետները գործնականում գերազանցում են Ընկերության կողմից հայտարարված առավելագույն ժամկետները, առերևույթ պարունակում է հասարակության մոլորեցման դրսևորմամբ անբարեխիղճ մրցակցության հատկանիշներ:

Օրենքի 92-րդ հոդվածի 1-ին մասի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 7-րդ մասի համաձայն՝ անբարեխիղճ մրցակցության համար նշանակվող տուգանքի չափը կազմում է տնտեսավարող սուբյեկտի՝ տվյալ իրավախախտմանը նախորդող տարվա հասույթի մինչև հինգ տոկոսը:

Օրենքի 93-րդ հոդվածի 13-րդ մասի համաձայն՝ նախորդ տարում 12 ամսից պակաս գործունեություն իրականացրած լինելու դեպքում սույն հոդվածով նախատեսված տուգանքների չափը կազմում է իրավախախտմանը նախորդող, բայց ոչ ավելի, քան 12 ամսվա գործունեության ժամանակահատվածի հասույթի նկատմամբ սույն հոդվածում նախատեսված տոկոսը:

Հիմք ընդունելով վերոգրյալը և ղեկավարվելով Օրենքի 76-րդ հոդվածի 1-ին մասի 3-ին կետով, 79-րդ հոդվածի 3-րդ մասի 1-ին կետով, 83-րդ հոդվածի 1-ին մասով և 42-րդ հոդվածի 2-րդ մասով՝ Հանձնաժողովը

Ո Ր Ո Շ Ե Ց

1. «Օնէքս» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ հարուցել վարույթ:

2. Սույն որոշումն ուժի մեջ է մտնում ընդունման պահից:

ՆԱԽԱԳԱՀ

Գ. ԳԵՎՈՐԳՅԱՆ

2022 թ. հուլիսի 29
Երևան